

Ina vatga da razza brina preparada sco attracziun

In'expoziun da muvel en il Museum da la natira dal Grischun

■ (anr/grc) Entamez en il local sa chatta la vatga brina Priscilla preparada sco attracziun che è vegnida undrada trais giadas cun in premi a Dortmund sco meglier preparat. La vatga da set onns è vegnida empagliada da *Wolfgang Hauser* dad Eigeltingen (D). L'expoziun speziala en il Museum da la natira da Cuir che dura dals 20 da zercladur enfin ils 7 d'october è fitg infurmativa.

Expoziun infurmativa e divertenta

Saja quai la vatga sco simbol per la Svizra en l'exteriur, sco mascotta per la reclama da tschigulatta u sco object per l'art dettia l'armaint la tempra a la cuntrada svizra cultivada sco strusch in auter animal da chasa. Quella expoziun saja vegnida concepida dal Museum da la natira da Lucerna, èsi vegnì fatg a savair ier a chaschun d'ina conferenza da pressa al lieu, numnadamain en il Museum da la natira a Cuir. Quella expoziun infurmescha las visitadras ed ils visitaders en moda e maniera divertenta davart da la derivanza da las razzas da biestga, davart da l'anatomia e davart dal cumportament e sa chapescha pertutgand il latg ed ils products da latg sco er pertutgant la «politica da latg».

Er per tgi che vul mulscher a maun

Dentant che sutgas da mulscher stattan a disposiziun po mintgina e mintgin far l'emprova da mulscher a maun, insatge che strusch il pur giuven sa pli. Numnadamain è là la «vatga per exercitar» Flora per quest intent.

L'expoziun speziala «Expoziun da muvel – l'armaint en il museum» – ch'è vegnida concepida dal Museum da la natira da Lucerna – è in'expoziun da divertiment extraordinaria davart in animal ch'è apparentamain enconuscent; in'expoziun che surprena, che divertescha, che fa surstar e patratgar e che fascinescha grond e pitschen.

Expoziun da muvel – il num è il program: Empè da vitrinas e da paraids d'expoziun ina suenter l'autra furma ina scossa da 15 vatgas da lain cruschà da grondezza natirala il «mobigliar da l'expoziun». El las stattan en pes dond da la cua, duas giaschan per terra, gruppas denturn la suletta «dretga» vatga: Priscilla. Questa vatga ha numnadamain gudagnà il favrer 2004 a la 6. concorrenza europea da las preparaturas e dals preparatur a Dortmund gist trais premis, tranter auter in cun il predicat «best of show».

L'expoziun infurmescha en moda chapaivla e divertenta davart la derivanza, davart il daventar animal da chasa, davart las razzas, davart la constituziun dal corp, davart la biologia e davart il cumportament sco er davart quai che va en davant e vegn or davos. Plinavant cuntegna l'expoziun anc ils suandants temas: il latg, ils products da latg, la politica da latg, las modas da tratga e la biotecnologia sco er las vatgas svizras, ils Svizzerots, la cultura e la culinaria.

Attracziuns spezialas da l'expoziun da muvel en la vatga Flora, vi da la quala ins po emprendre a mulscher e la vatga Ida, per lung da la quala ins po tadlar giu las rumurs dal corp... Per las visitadras e per ils visitaders stattan a disposiziun sutgas da mulscher, per ch'ellas ed els possian giudair l'expoziun da muvel or da la perspectiva d'ina mulschadra u d'in mulschader.

L'expoziun speziala «expoziun da muvel» cuntegna er in ritg program accompagnant per grond e pitschen.

Infurmaziuns chattais Vus sut www.naturmuseum.gr.ch.

Uras d'avertura da l'expoziun: Mardi fin dumengia 10.00 – 17.00. Il glindesdi resta il museum serrà.



15 vatgas da lain remplazzan las vitrinas en questa expoziun.